

**Aktiaatillit kinaassusersinissaat, paasissutissat ingerlateqqittarneri, aamma aktiaatillit
pisinnaatitaaffiinik ingerlatsinermik oqilisaaneq pillugit Kalaallit Nunaannut
inatsisissatut siunnersuummik Namminersorlutik Oqartussat akuersissuteqarnissaat
pillugu Inatsisartut aalajangiiffigisassaattut siunnersuut**

Inuussutissarsiornermut Niuernermullu Naalakkersuisumit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Mariane Paviassen, Inuit Ataqatigiit, Siulittaasoq

Inatsisartunut ilaasortaq Lars Poulsen, Siumut, Siulittaasup tullia

Inatsisartunut ilaasortaq Aqqalu Jerimiassen, Atassut

Inatsisartunut ilaasortaq Karl Tobiassen, Siumut

Inatsisartunut ilaasortaq Knud Mathiassen, Inuit Ataqatigiit

Inatsisartunut ilaasortaq Harald Bianco, Inuit Ataqatigiit

Inatsisartunut ilaasortaq Aslak Wilhelm Jensen, Siumut

UKA2021-mi ulloq 29. September siullermeerinninnerup kingorna siunnersuut
ataatsimiititaliamit misissorneqarpoq.

Siunnersuutip imarisai siunertaalu

Aktiaatillit kinaassusersinissaat, paasissutissat ingerlateqqittarneri, aamma aktiaatillit
pisinnaatitaaffiinik ingerlatsinermik oqilisaaneq pillugit Kalaallit Nunaannut inatsisissatut
siunnersuummik Namminersorlutik Oqartussat akuersissuteqarnissaat Naalakkersuisunit
siunnersuutigineqarpoq.

Aktiaatillit kinaassusersinissaannut, paasissutissat ingerlateqqittarnerinut, aamma aktiaatillit
pisinnaatitaaffiinik ingerlatsisarnerup oqilisaavigineranut tunngatillugu Europa-Parlamentip
aamma Rådip malitassaani 2007/36/EF-imi aalajangersakkanik atuutsitsinermut tunngatillugu

minnerpaamik piumasaqaatit aalajangernissaat pillugit naammassinninnissamut Kommissionip peqqussutaa (EU) nr. 2018/1212, 3. september 2018-imeersumi aalajangersakkanut assingusunik Kalaallit Nunaanni atuutsitsisinnaanermut tunngavissamik pilersitsinissaq Inatsisissatut siunnersuutip siunertaraa.

Ingerlatseqatigiiffiit pappialanik nalilinnik niuerfinni niuerutaasinnaasut, aktiaatillit akuullutik piginnittuunissaasa tapersorsorsinnaanissaat siunertaralugu aktiaatillit pisinnaatitaaffii pillugit malitassiakkut aktiaatillit kinaassusersinissaannut pisinnaatitaaffeqalerput. Maleruagassat taakku ingerlatseqatigiiffiit pillugit inatsisip, aningaasanik niuerfiit pillugit inatsisip, aningaasaqarnermik suliffiuteqarneq pillugu inatsisip, aamma inatsisit allat assigiinngitsut allanngortinneqarnerat pillugu inatsit nr. 369, 9. april 2019-imeersukkut ingerlatseqatigiiffiit pillugit inatsisip allanngortinneqarneratigut Danmarkimi naammassineqarput (Ungasinnerusumut isigaluni akuulluni piginnittuunissap kaammattuutigineqarnissaa pillugu aktiaatillit pisinnaatitaaffii pillugit peqqussutip allanngortinneqarnerata naammassineqarnera). Inatsisit taakku kunngip peqqussutaatigut Kalaallit Nunaannut atuutsinneqalernissaat eqqarsaataavoq.

Inatsisartuni siunnersuummik siullermeerinnineq

Siullermeerinninnermi siunnersuummut tapersiisoqarluarpoq.

Tusarniaaneq

Siunnersuut piffissami 5. februar 2021-miit 5. marts 2021-mut tusarniaassutigineqarpoq. Tusarniaanermut tunngatillugu ataatsimiititaliaq allanik ilanngussassaqaqngilaq.

Ataatsimiititaliap siunnersuummik suliarinninnera

Kalaallit Nunaanni malittarisassanik nalunaarsuisarnermut kiisalu ingerlatseqatigiiffiit aktiaatillillu akornanni paasissutissanik ingerlatsisarnermut pingaaruteqartunik nunani tamalaani malittarisassanut naapertuuttunngortitsinissamut sinaakkusiinissaq siunnersuutikkut kissaatigineqartoq ataatsimiititaliamit maluginiarneqarpoq. EU Kommissionip naammassinninnissamut peqqussutaani (2018/1212) 3. september 2018-imeersumi malittarisassanik, allannguutinillu Kalaallit Nunaanni pissutsit naapertorlugit pisariaqartunik Kalaallit Nunaannut atuutilersitsinissamut pisariaqartinneqartunik Kalaallit Nunaannut atuutilersitsinissamut danskit inuussutissarsiornermut naalakkersuisuannik piginnaatitsinikkut tamanna pissaaq.

Inatsisissatut siunnersuut piginnittuut pillugit malittarisassiat katersat ilagaat. Inatsisissatut siunnersuutip matuma saniatigut malittarisassiat katersat imaraat ingerlatseqatigiiffiit pillugit inatsisip, suliffiit inuussutissarsiutitut ingerlatat ilaat pillugit inatsisip, inuussutissarsiutigalugu aningaasaateqarfiit pillugit inatsisip aamma aningaasaateqarfinnut inatsisip nutarsarneri.

Paatsoornartoqaqqunagu ataatsimiititaliamit oqaatigineqassaaq siunnersuutip matuma akuersissutigineqarneratigut siunissami malittarisassanik EU Kommissionip peqqussutaanik (2018/1212) naammassinninnissamut piumasaqaataajumaartunik akuersissuteqarnissamut Naalakkersuisut piginnaatinneqassapput, taakku Inatsisartunut saqqummiuteqqaanngikkaluarlugit.

Tassunga atatillugu Naalakkersuisut soqutiginnittunik tusarniaasarnermi periutsinik nalinginnaasunik malinnittussaapput, Naalakkersuisut suleriaasiat pillugu Namminersorlutik Oqartussat nalunaarutaanni nr. 18, 9, november 2017-imeersumi § 9-mi allassimanera malillugu missingiutit taamaattut oqartussanut kattuffinnullu siunnersuummut soqutiginninnaasunut imaluunniit missingiutip naammassisarnerani pingaarutilimmik ilisimasaqartutut isumaqarfigineqartunut oqaaseqarfigisassatut nassiunneqartussaapput.

Ataatsimiititaliap maluginiarpaa tusarniaanermik ingerlatseriaaseq nalunaarummi siuliani taaneqartumi kiisalu Inatsisitigut najoqqutassanik, Kunngip peqqussutaanik, nassuiaatinik il.il. Namminersorlutik Oqartussani avataanullu tusarniaanermut najoqqutassani nassuiaatigineqartoq, taamaammallu tusarniaanerup qanorpiaq ingerlanneqarnissaanik Naalakkersuisut nalilersuisussaatitaasut, matumani aamma kikkut tusarniaanermi illuatungiusutut il.il. ilaatinneqarnissaanik nalilersuillutik. Tassunga atatillugu ataatsimiititaliamit naatsorsuutigineqarluinnarpoq siunissami allannguinerit Kalaallit Nunaanni pissutsinut naleqqussarneqarnissaasa pisariaqarnera qulaajarumallugu nunami maani tusarniarneqartut allannguutit taamaattut kingunerisinnaasaat pillugit nalilersuinissamut oqaaseqaateqarnissamullu pisariaqartitsineq naapertorlugu piffissaqartinneqarnissaat Naalakkersuisunit qulakkeerneqartassasoq.

Siunnersuutip aningaasaqarnikkut kingunissai

Siunnersuut Kalaallit Nunaanni pisortanut, inuussutissarsiummik ingerlatsisunut innutaasunullu aningaasaqarnikkut allaffissornikkullu kinguneqarnaviannngitsaq Naalakkersuisut naliliipput.

Danmarkimi inuussutissarsiornermut naalakkersuisoqarfik naliliivoq inatsisissatut siunnersuutip pisortanut aningaasaqarnikkut kinguneqarnissaa naatsorsuutigineqanngitsaq. Inatsisissatulli siunnersuut piginnittuut pillugit malittarisassianut arlariaanut ilaavoq Malittarisassianik taakkuninnga atuutilersitsinermut piumasaqaataavoq Inuussutissarsiornermik Aqutsisoqarfiup nalunaarsueriaasianik allannguinnissaq, taamaalillutik piginnittuinnut tunngatillugu nalunaarsuisarnermut piumasaqaatitigut nakkutilliinermullu atuuffeqarnikkut Kalaallit Nunaanni suliffeqarfiit Danmarkimi suliffeqarfittut pisussaaffilerneqarlutik. Kalaallit Nunaanni suliffeqarfinni qarasaasiat atorlugit aaqqiissutikkut piginnittuutit nalunaarsorneqarsinnaanerisa periarfissaanerata saniatigut suliffeqarfinnik il.il. pilersitsinermi piumasaqaataassaaq piginnittuutit akuerisat nalunaarsornissaat.

Inuussutissarsiornermik Aqutsisoqarfiup nalunaarsueriaasianik allannguinnissaq allannguinnermut taakkununga piumasaqaataavoq. Inuussutissarsiornermut naalackersuisoqarfik naliliivoq suliassanut taakkununga atatillugu qarasaasiat atorlugit aaqqiissummik naleqqussaanermut 2021-mi saniatigut 3,6 mio. kr.-inik, 2022-miit 2025-p tungaanut ukiumut 1,7 mio. kr.-inik kiisalu 2026-mi 1,6 mio. kr.-inik pisariaqartitsisoqassasoq. Ataatsimiititaliap Naalackersuisut allassimasaannik paasinninnera malillugu aningaasartuutit taaneqartut danskit oqartussaasuinit akilerneqartussaassapput.

Ataatsimiititaliap inassuteqaatai

Ataatsimiititaliap isumaqatigiittup siunnersuut **akuersissutigineqassasoq** inassutigaa.

Ataatsimiitaliap taama oqaaseqaateqarluni isumaliutissiisummilu allassimanageratut paasinnilluni siunnersuut aappasaaniigassanngortippaa.

Mariane Paviasen
Siulittaasoq

Lars Poulsen
Siulittaasup tullia

Aqqalu Jerimiassen

Karl Tobiassen

Knud Mathiassen

Harald Bianco

Aslak Wilhelm Jensen